

19/02/1997

STC mampu tarik pelabur ke Sabah

KOTA KINABALU, Selasa - Negeri Sabah dijangka menjadi tumpuan utama aktiviti perdagangan dan pelaburan Kawasan Pertumbuhan Ekonomi Brunei, Indonesia, Malaysia serta Filipina (BIMP-EAGA), berikutan pembukaan Pusat Dagangan Sabah (STC), di sini.

Ketua Menteri, Datuk Yong Teck Lee, berkata ia adalah pusat dagangan tunggal dan yang pertama diwujudkan dalam kawasan BIMP-EAGA.

"Sehubungan itu, saya percaya pusat ini akan menjadi tumpuan utama dalam aktiviti perdagangan dan pelaburan bagi seluruh kawasan BIMP-EAGA dalam tempoh terdekat dan akan datang," katanya.

Beliau berkata demikian pada Majlis Perjumpaan Aidilfitri dan Tahun Baru Cina yang dihadiri Perdana Menteri, Datuk Seri Dr Mahathir Mohamad di Likas, malam tadi.

Sebelum itu, Perdana Menteri diberi penghormatan merasmikan pembukaan STC.

Yong berkata, selain berperanan sebagai pusat maklumat perdagangan dan pelaburan setempat, STC mempunyai kemudahan pameran yang luas dan selesa.

"Saya berkeyakinan STC berjaya memainkan peranannya dalam memajukan lagi aktiviti serta pertumbuhan ekonomi negeri ini.

"Oleh itu, saya berharap ahli perniagaan dan pelabur tidak melepaskan peluang menggunakan kemudahan yang disediakan ini," katanya.

Bagaimanapun, katanya, mereka yang berhasrat mengadakan ekspo perdagangan secara besar-besaran di STC terpaksa menunggu sehingga tahun depan berikutan ruang pamerannya habis ditempah bermula Mac hingga Disember tahun ini.

Beliau berkata, tempahan mengadakan 13 pameran yang meliputi pelbagai aspek perdagangan dan pelaburan pada tahun ini, membuktikan hasrat kerajaan negeri menjadikan STC sebagai penggerak utama pertumbuhan ekonomi mula menampakkan hasil.

Sementara itu, Yong berkata, kerjasama erat antara Kerajaan Persekutuan dengan kerajaan negeri perlu dikekalkan bagi memastikan pembangunan rakyat terus berlaku.

"Kita menyedari memang banyak masalah yang dihadapi negeri ini sejak dulu lagi yang tidak mungkin dapat diselesaikan tanpa sokongan penuh Kerajaan Persekutuan.

"Ia termasuklah masalah keselamatan, pendatang tanpa izin, kemudahan pendidikan dan perubatan serta usaha membasmi kemiskinan," katanya.

Katanya, lawatan Perdana Menteri ke negeri itu menunjukkan beliau begitu memahami dan prihatin terhadap masalah yang wujud di Sabah, selain memberi sokongan terhadap usaha pembangunan kerajaan negeri.

(END)